

四庫全書

經部

欽定四庫全書

經部  
讀詩略記卷三

詳校官監察御史臣曹錫寶

通政使司副使臣莫瞻菴覆勘

總校官庶吉士臣朱 鈐

校對官編修臣邱庭瀍

謄錄監生臣汪名達

欽定四庫全書

讀詩畧記卷三

明 朱朝瑛 撰

小雅

嚴坦叔曰雅之大小特以體之不同耳蓋優柔委曲意在言外風之體也明白直言其事雅之體也純乎雅之體者為雅之大雜乎風之體者為雅之小也鹿鳴之什

鹿鳴

呦呦鹿鳴食野之苹我有嘉賓鼓瑟吹笙吹笙鼓簧承筐是將人之好我示我周行

序曰燕羣臣嘉賓也孔疏曰燕禮立一人以為賓使宰夫為主然燕享之事容有四方之賓故鄉飲酒燕禮註云鹿鳴者君與臣下及四方之賓燕講道脩德之樂歌也以四牡例之當為武王即位以後之詩凡四方之賓莫非其臣故但曰羣臣嘉賓

毛傳曰鹿得苹呦呦然鳴而相呼懇誠發乎中公食  
大夫禮公受宰夫束帛以侑注十端帛也食有幣則  
燕可知周語曰天子之燕有加豆折俎酬幣燕貨以  
示容合好是燕固用幣也乃燕禮無用幣之文知古  
禮之殘缺多矣或以此詩專為饗作而通用于燕非  
也

呦呦鹿鳴食野之蒿我有嘉賓德音孔昭視民不忮君  
子是則是傲我有旨酒嘉賓式燕以教

范淳夫曰式燕以教言其禮之從容也夫莊而不至於矜和而不至于流此其德之純矣

呦呦鹿鳴食野之苹我有嘉賓鼓瑟鼓琴鼓瑟鼓琴和樂且湛我有旨酒以燕樂嘉賓之心

四牡

四牡騤騤周道倭遲豈不懷歸王事靡盬我心傷悲

序曰勞使臣之來也使臣所之必非一國詩中但稱周道則是武王周公之詩非文王率叛事紂之詩明

甚

四牡駢駢嘽嘽駟馬豈不懷歸王事靡盬不遑啓處  
翩翩者騅載飛載下集于苞栩王事靡盬不遑將父  
騅一名祝鵠埤雅騅孝鳥騅與鴈鵠性皆專一故有  
尸祝之號嘽以慈告祝以孝告也即今班鳩

翩翩者騅載飛載止集于苞杞王事靡盬不遑將母  
駕彼四駟載驟駸駸豈不懷歸是用作歌將母來諭  
父之念子或能以義自慰母之姑息易致憂傷再言

將母上之深體下情委曲詳悉如此左傳辛伯諗周桓公是以言告為諗也

皇皇者華

皇皇者華于彼原隰駉駉征夫每懷靡及  
序曰君遣使臣也

華無所不被興使臣之懷無所不周也

我馬維駒六轡如濡載馳載驅周爰咨諏

左傳咨事為諏魯語咨才為諏說文云諏聚謀也取



才必以衆推當從魯語為正

我馬維駒六轡如絲載馳載驅周爰咨謀

左傳咨難為謀魯語咨事為謀凡事皆須詳審何必患難亦當以魯語為正

我馬維駱六轡沃若載馳載驅周爰咨度

左傳咨禮為度魯語咨義為度禮義一也毛傳曰咨禮義所宜是已

我馬維駒六轡既均載馳載驅周爰咨詢

左傳魯語皆云咨親為詢言故舊不遺上所親愛者則慰問之是為詢也魯語又言忠信為周即忠信行蠻貊之意非以忠信訓周也諏謀度詢皆以靡及之懷行之則無所不周矣

常棣

常棣之華鄂不韡韡凡今之人莫如兄弟

序曰燕兄弟也周公閔管蔡之失道故作此詩按國語富辰之言以為周文公之詩而春秋傳又以為召

穆公所作意穆公因其舊文竄以新義如草虫之詩  
云耳故傳又云周之有懿德也猶曰莫如兄弟故封  
建之其懷柔天下也猶懼有外侮故以親屏周召穆  
公亦云則周公作之而穆公述之明矣常棣或作棠  
棣其實即幽風之鬱今曰郁李是也一蒂必有兩花  
兄弟之象陸璣以為萸李誤矣戴侗以唐棣常棣為  
一種者尤誤爾雅云唐棣移自是楊屬與此絕異不  
韓韓者韓韓也鄭箋以鄂為萼以不為拊謂古聲同

相借也或據六月詩疏雜問志云韋之不注謂即左傳韋之跗注或據伏琛齊記華不注山謂如華跗之注于水以証不之為跗可謂極博然此皆康成以後之書不足為據且兄弟之象已見于棣光明之義自應屬華即不果為跗于此無取也

死喪之戚兄弟孔懷原隰哀矣兄弟求矣

脊令在原兄弟急難每有良朋況也永歎

禽經云脊令友悌張華注云脊令雀屬共母者飛鳴

不相離故取以喻兄弟何玄子曰急難言相急于患難國語急病讓夷戰國策公子高義能急人之難正

同此

兄弟閱于牆外禦其務每有良朋烝也無戎

顏之推曰兄弟之際異于他人望深則易怨地親則易狎蘓子由曰兄弟內閱不廢外禦使良朋而相忿但無為戎以相害而已晦翁云戎或訓汝當與汝音相通故常武首章亦以戎與父叶

喪亂既平既安且寧雖有兄弟不如友生

何玄子曰周家之國祚既安公之心亦可以釋然而  
自寧矣乃回想兄弟之間辟者辟囚者囚生死升沈  
迴不相及曾不如一時友生戮力王室者今日得以  
享太平也此公痛悼之語

儼爾籩豆飲酒之飫兄弟既具和樂且孺  
妻子好合如鼓瑟琴兄弟既翕和樂且湛  
宜爾室家樂爾妻孥是究是圖亶其然乎

伐木

伐木丁丁鳥鳴嚶嚶出自幽谷遷于喬木嚶其鳴矣求其友聲相彼鳥矣猶求友聲矧伊人矣不求友生神之聽之終和且平

序曰燕朋友故舊也

伐木許許醕酒有藇既有肥羜以速諸父寧適不來微我弗顧於粲洒掃陳饋八簋既有肥牡以速諸舅寧適不來微我有咎

孔疏云儀禮特牲少牢聘禮公食之等皆以簋盛黍稷則八簋是食禮也醕酒肥羜為燕禮此為食禮蓋互陳之鄧潜谷曰我之速之豈適有故而不得來將無我弗顧我有咎而不來也自反深而望之切矣此說較勝

伐木于阪醕酒有衍籩豆有踐兄弟無遠民之失德乾餱以愆有酒湑我無酒酤我坎坎鼓我蹲蹲舞我迨我暇矣飲此湑矣



天保

天保定爾亦孔之固  
俾爾單厚何福不除  
俾爾多益以莫不庶

序曰下報上也大臣之中或作此以為報非羣臣通歌此詩也鄒肇敏曰史記武王憂天保之未定于是有營洛之意此詩之作蓋在東都既成後乎單與殫通頌單厥心是也除即易除戎器之除

天保定爾俾爾戢穀聲無不宜受天百祿降爾遐福維

日不足

戩與翦通周頌實始翦商說文作戩是也劉熙釋名云翦進也則戩亦有進義言日進於善德即為福也禮祭統曰福者備也無所不順之謂備言內盡于已而外順于道也此罄無不宜之謂也惟其以德為福故維日不足

天保定爾以莫不興如山如阜如岡如陵如川之方至以莫不增

吉蠲為饔是用孝享禴祠烝嘗于公先王君曰卜爾萬壽無疆

禴禘嘗烝王制文也祠禴嘗烝周禮文也爾雅與周禮同而禴作禘孫炎注云祠之言食禘者新菜可烝嘗者嘗新穀烝者進品物也新菜可烝之說恐未必然一說夏祭以樂為主故曰禴此得之矣王制獨異其禮者或以為夏殷之禮則王制所言者皆周禮不得以此獨推之夏殷意禘祭之歲則省祠禮推禴于

春而行禘于夏耳記者不詳誤以為定制蓋世遠傳疑家自為說不可強合也

神之弔矣詒爾多福民之質矣日用飲食羣黎百姓偏為爾德

弔訓至本爾雅文說文作逆此章即二章以德為福之意而推廣之于羣黎百姓也百姓毛傳云百官族姓也按左傳云天子命德因生以賜姓國語云王公之子弟能言能聽徹其官者物賜之姓使監其官是

為百姓以是言之則毛傳信有據也然在唐虞則然  
三代以降已為庶人之通稱矣詳書畧記

如月之恒如日之升如南山之壽不騫不崩如松柏之  
茂無不爾或承

恒釋文作絙弦也音古恒反騫說文云馬腹繫也考  
工記云小體騫腹是繫者收束之意蓋言瘦也故借  
為虧損之義荀子引逸詩曰長夜漫兮永思騫兮注  
云騫咎也亦謂德之虧也自唐以後與騫通用遂為

騰起之解非古也

采薇

采薇采薇薇亦作止曰歸曰歸歲亦莫止靡室靡家玁狁之故不遑啓居玁狁之故

序曰遣戍役也文王遣之也或以昔我往矣四語與出車同謂此亦勞詩似也然起語直叙景物自是指點目前絕非追憶語氣李彭山曰古者出師以喪禮處之則無宴樂寧有遣詩按國語武王伐紂以夷則

之上宮畢陳名之曰羽以黃鍾之下宮布戎于牧野  
名之曰厲曰羽曰厲蓋樂章之名也所云喪禮處之  
者謂如鑿凶門之類耳豈必遂無詩歌燕太子之送  
荆卿皆白衣冠以送之然尚有變徵之聲況于盛世  
仁義之師乎

商之獯鬻即周之玁狁在漢為匈奴唐為突厥宋為  
契丹後并于元今為韃靼

采薇采薇薇亦柔止曰歸曰歸心亦憂止憂心烈烈載

飢載渴我戍未定靡使歸聘

采薇采薇薇亦剛止曰歸曰歸歲亦陽止王事靡盬不  
遑啓處憂心孔疚我行不來

薇之生有遲早故剛柔不一非異時也十月為陽本

爾雅文

彼爾維何維常之華彼路斯何君子之車戎車既駕四  
牡業業豈敢定居一月三捷

常華棠華也常棣之華左傳作棠棣是棠與常通也



爾雅杜赤棠白者棠自有棠華與常棣無與本草云  
棠即今棠梨也爾說文作藟三捷古人常語數多者  
必稱三蓋三者數之小成也如易三禡三驅論語三  
思三復之類

駕彼四牡四牡騤騤君子所依小人所腓四牡翼翼象  
弭魚服豈不日戒玁狁孔棘

腓本實字而虛用之隨動曰腓猶擔荷曰肩承當曰  
膺也

昔我往矣楊柳依依今我來思雨雪霏霏行道遲遲載  
渴載飢我心傷悲莫知我哀

轉盼之間今已成昔而往者又將歸矣時移物變之  
感飢渴勞苦之憂皆曲體而預道之言莫知者正所  
以為深知言傷悲者正所以為慰悅也

出車

我出我車于彼牧矣自天子所謂我來矣召彼僕夫謂  
之載矣王事多難維其棘矣

序曰勞還率也天子與王皆謂紂也文王以紂之命  
命之也馬貴與曰古人用兵必以車戰意在聲罪致  
討其坐作進退整暇有法未嘗掩人之不備而以奇  
取勝也至戎狄之侵中國則雲合鳥散輕進易退于  
是車之雍容不足當其徒之慄疾遂致舍車而用徒  
而車戰之法廢矣

我出我車于彼郊矣設此旄矣建彼旄矣彼旃旄斯胡  
不旆旆憂心悄悄僕夫况瘁

郊遠郊即牧地旃以統前軍而設旐建旐則軍前之  
大旗大將所建爾雅曰緇廣充幅曰旐繼旐曰旒蓋  
若後世之皂纛非龜蛇之旐也故建旐獨于旐不于  
旃旂詳見六月及車攻篇

王命南仲往城于方出車彭彭旂旐央央天子命我城  
彼朔方赫赫南仲玁狁于襄

央央通作英英朔方今陝西寧夏衛其地為華夷要  
區季彭山云城朔方所以斷戎狄往來之路使不得

相犄角也按襄與攘通

昔我往矣黍稷方華今我來思雨雪載塗王事多難不遑起居豈不懷歸畏此簡書

嘒嘒草蟲趯趯阜螽未見君子憂心忡忡既見君子我心則降赫赫南仲薄伐西戎

春日遲遲卉木萋萋倉庚喈喈采繁祁祁執訊獲醜薄言還歸赫赫南仲玁狁于夷

文王之時尚用商正商雖改正不改時月故萋萋喈

皆得為春日何玄子曰城朔方則獫狁不得乘虛為害而西戎可伐伐西戎則有以翦獫狁之羽翼而獫狁可平事實相因也

扶杜

有杜之杜有睨其實王事靡盬繼嗣我日日月陽止女心傷止征夫遑止

序曰勞還役也季彭山以但述室家憂思不及戎役勞苦謂非勞還之詩然戎役之勞苦有不可勝言者

故以檀車四牡點綴一二而槩之曰而多為恤則種  
種勞苦盡舉諸此豈得不為勞詩

何玄子曰睨即檀弓華而睨之睨蓋光澤之貌

有杖之杜其葉萋萋王事靡盬我心傷悲卉木萋止女  
心悲止征夫歸止

陟彼北山言采其杞王事靡盬憂我父母檀車幘幘四  
牡瘡瘡征夫不遠

嚴華谷云杞當是枸杞杞之可食者惟枸杞也

匪載匪來憂心孔疚期逝不至而多為恤卜筮偕止會  
言近止征夫邇止

多恤心之疑慮多端也禮小事龜筮不相襲今相襲  
俱作以其惶惑不定故無所不為也

南陔

序曰孝子相戒以養也既有其義必有其辭苟無其  
辭義何繇立儀禮于鹿鳴三篇曰歌于南陔三篇曰  
樂曰奏蓋升歌三終笙入三終合樂三終乃當時制



樂之節如此非詩之可吹而不可歌也既歌者之所  
不習故詩亦因之而遂亡與鄭箋云毛公闕其亡者  
以見在為數故推改什首非孔子之舊也晦翁以儀  
禮正其篇次當矣

白華之什

白華

序曰孝子之潔白也不失其身以事其親之謂也

華黍

序曰時和年豐宜黍稷也

魚麗

魚麗于罍鱸魚君子有酒旨且多

序曰美萬物盛多能備禮也此未可斷為文武之詩  
要亦周初所作若以為燕享通用之樂歌則關雎卷  
耳諸篇燕飲皆用之不獨此矣

鯨有海鯨其大盈舟知此為小魚者詩中所陳皆非  
海魚也

魚麗于鰒鮐鱧君子有酒多且旨

爾雅鱧鮐舍人曰鱧一名鮐郭璞云鱧鮐也按下云  
鰒大鮐小者鮐則鮐之別于鱧明矣且鮐者今之黑  
魚鮐者今之草魚舉其美者當以鮐為是說丈鱧鮐  
也本草鮐一名鱧魚後人訛鱧為鱧耳

魚麗于鰒鰒鯉君子有酒旨且有

爾雅鰒鮐孫炎曰鰒一名鮐郭璞以為白魚非也鮐  
魚體平故得偃名白魚昂首不可云偃矣

物其多矣維其嘉矣

維其者推本之辭與上之言且不同嘉者言情之好也維情之好故其多可尚也下倣此

物其旨矣維其偕矣

偕者言禮之備也荀子引此詩而曰不時宜不敬交不驩欣雖指非禮也指與旨同驩欣者情好也敬交者禮備也時宜者閒暇也

物其有矣維其時矣

呂東萊曰時者言國家閒暇內外無故也

由庚

序曰萬物得由其道也

南有嘉魚

南有嘉魚烝然罩罩君子有酒嘉賓式燕以樂

序曰樂與賢也嚴華谷曰魚曰嘉瓠曰甘離為孝鳥皆以喻吉士也始則多方勤求之繼則屈已以招延之其後則賢者聞風而自至矣

南有嘉魚烝然汕汕君子有酒嘉賓式燕以衍

鄭箋云櫟者今之療罟蓋即罟類

南有柞木甘瓠累之君子有酒嘉賓式燕綏之

翩翩者騅烝然來思君子有酒嘉賓式燕又思

周禮掌客之職上公三燕侯伯再燕燕而又者親之也亦尊之也

崇丘

序曰萬物極其高大也即中庸發育萬物峻極于天

之意

南山有臺

南山有臺北山有萊樂只君子邦家之基樂只君子萬壽無期

序曰樂得賢也嚴華谷云臺萊桑楊之類喻賢者之多而皆有用也臺似莎而大抽臺特高故謂之臺其葉可以為蓑笠皮可以為簦笠莖可以為布及屨夫須者匹夫所須也今俗謂之黃草陸璣以為莎非也

爾雅臺夫須又云藹侯莎臺與莎自是二物說文云  
萊蔓華也爾雅云釐蔓華萊與釐通即藜也初生葉  
可食老則幹可為杖

南山有桑北山有楊樂只君子邦家之光樂只君子萬  
壽無疆

南山有杞北山有李樂只君子民之父母樂只君子德  
音不已

南山有栲北山有杻樂只君子遐不眉壽樂只君子德



音是茂

杻即椿詳山有樞篇

南山有枸北山有棟樂只君子遐不黃耇樂只君子保艾爾後

枸通作棋曲禮婦人之摯棋榛內則芝栢菱棋棋即木蜜也

由儀

序曰萬物之生各得其宜也

蓼蕭

蓼彼蕭斯零露漙兮既見君子我心寫兮燕笑語兮是  
以有譽處兮

序曰澤及四海也此蓋諸侯朝于天子而歡慶頌禱  
之詞以零露喻恩澤此極顯切非妄說也

蘓頴濱曰諸侯來朝王者推恩以接之無所不及如  
零露之于蕭故其既見天子也其心莫不傾盡郝楚  
望曰燕者安樂之意

蓼彼蕭斯零露瀼瀼既見君子為龍為光其德不爽壽考不忘

為龍為光鄭箋云言天子之恩澤光耀被及已也呂東萊曰王者德施之普各稱其分所謂其德不爽也蓼彼蕭斯零露泥泥既見君子孔燕豈弟宜兄宜弟令德壽豈

宜兄宜弟推本天子之德始于齊家也左傳富辰曰周公弔二叔之不咸故封建親戚以藩屏周此詩亦

本乎封建之意以頌美之九族既睦萬邦所繇以協和也

蓼彼蕭斯零露濃濃既見君子倬革沖沖和鸞雖雖萬福攸同

王介甫云乘馬路車天子所以好諸侯也有車馬則有倬革和鸞矣上下相遇以德而成以禮則萬福所同也曰同是天下皆被其福也

湛露

湛湛露斯匪陽不晞厭厭夜飲不醉無歸

序曰天子燕諸侯也燕禮有無算爵無算樂君曰無不醉賓及卿大夫皆對曰諾敢不醉

湛湛露斯在彼豐草厭厭夜飲在宗載考

箋主同姓言之謂賓既辭去復畱同姓以盡私恩也  
楚茨曰諸父兄弟備言燕私祭祀如此燕饗可知燕  
禮必于路寢而云在宗者同姓諸侯以天子之宮為  
宗室也

湛湛露斯在彼杞棘顯允君子莫不令德

以下復兼異姓同姓言之

其桐其椅其實離離豈弟君子莫不令儀

彤弓之什

彤弓

彤弓召兮受言藏之我有嘉賓中心貺之鐘鼓既設一朝饗之

序曰天子錫有功諸侯也左傳云饗以訓恭儉晏以

示慈惠又云享有體薦宴有折俎是享與宴異也詩  
言饗之而左傳甯武子云諸侯敵王所愾而獻其功  
于是乎賜之彤弓彤矢旅弓旅矢以覺報宴則又有  
宴禮矣考聘禮公于賓一食再饗燕與羞倣獻無常  
數謂饗于廟燕于寢也始以行禮繼以遂情夫固有  
饗燕並行者矣左傳鄭享趙孟禮終乃燕天子于有  
功諸侯何獨不然故末章曰一朝疇之疇賓之禮燕  
則有之饗則無有也彤弓之賜以表有功而已康成

云專征伐誤也書文侯之命亦有彤弓之賜第云柔遠能邇惠康小民其後襄王賜文公亦曰以綏四國糾逖王慝無專征伐之語而況于盛世乎王制云賜弓矢然後征謂請命而征不云專也至若呂氏所云四夷入邊臣子篡弑雖未賜弓矢專之可矣

彤弓昭兮受言載之我有嘉賓中心喜之鐘鼓既設一朝右之

彤弓昭兮受言縶之我有嘉賓中心好之鐘鼓既設一



朝酺之

菁莪

菁菁者莪在彼中阿既見君子樂且有儀

序曰樂育材也天之生材實難上之人尊賢而養士  
則賢者得以盡其才而不賢者亦自勉于為善周禮  
大司徒之職以鄉三物教萬民而賓興之亦將以誘  
掖而鼓舞之也此詩美之以君子導之以喜樂接之  
以禮儀忘其賤而以為榮忘其勞而以為安其所以

誘掖而鼓舞之可謂至矣其即賓興之詩與則以為燕賓亦正相合

毛傳云長育人材如阿之長莪菁菁然阿說文云大陵也一曰曲阜也觀有卷之義則曲阜為正

菁菁者莪在彼中沚既見君子我心則喜

生于山者蘆蒿也莪也生于沚者萋蒿也蘩也亦謂之莪者類也

菁菁者莪在彼中陵既見君子錫我百朋

鄭箋五貝為朋言五種之貝各以二枚為朋也疏引漢書志為說乃王莽事恐非古法

汎汎楊舟載沈載浮既見君子我心則休

六月

六月棲棲戎車既飭四牡騤騤載是常服玁狁孔熾我是用急王于出征以匡王國

序曰宣王北伐也毛氏以為親征鄭氏以為命將夫玁狁既至涇陽逼近輦轂豈以中興之主不一親歷

行間以大振其聲靈乎張元祐曰此詩兩曰王于出征兩曰薄伐獫狁蓋宣王親統六師禦之境內而令吉甫直抵太原以驅之也

六月周正六月周禮王建太常常即旂也諸侯之旂亦謂之常大行人職云上公建常九旂侯伯建常七旂子男建常五旂

比物四驪閑之維則維此六月既成我服我服既成于三十里王于出征以佐天子

既成我服暑服也周正六月暑氣將至故暑服于此而成非為師行而成服也

四牡脩廣其大有顓薄伐玁狁以奏膚公有嚴有翼共武之服共武之服以定王國

膚與膺通膺者大臠故訓大周禮內饗外饗凡祭祀皆共刑膺而饋食禮有膚無膺則膚即膺耳蓋儀禮以豕腹為膚魚腹為膺而周禮通謂之膺也詳見周禮略記朱備萬曰嚴敬乃用師之要道書云欽承天

子威命敬也威克厥愛允濟嚴也

玁狁匪茹整居焦穫侵鎬及方至于涇陽織文鳥章白  
旆央央元戎十乘以先啓行

焦穫爾雅十藪周有焦護護與穫通今陝西三原縣  
有焦吳里蓋即焦穫之訛郭璞所云瓠中是也非兩  
地也鎬何玄子曰古文鎬鄠通用史周本紀復都豐  
鄠漢書叙傳遂亡酆鄠皆以鎬為鄠此詩之鎬乃鄠  
地也鄠本晉邑左傳哀四年齊弦施救范氏國夏伐

晉取鄆即今真定府高邑縣也其地正與太原接壤  
去周都千有餘里劉向所謂千里之鎬也方今太原  
陽曲縣有方山疑即其地若云朔方則于鎬不相涉  
矣涇陽在今西安府距周都三十餘里繼旄為旆本  
爾雅文考之左傳莊二十八年楚伐鄭子元闚御彊  
闚梧耿之不比為旆闚班王孫游王孫喜殿旆與殿  
對則是軍前大旗謂之繼旄之旆也詳出車篇元戎  
毛傳曰夏后氏曰鈞車先正也殷曰寅車先疾也周

曰元戎先良也

戎車既安如輕如軒四牡既佶既佶且閑薄伐玁狁至  
于太原文武吉甫萬邦為憲

毛傳曰佶正也與說文合所謂範我馳驅也太原今  
隸山西竹書穆王遷戎于太原則太原為戎狄所居  
玁狁即其種類其內侵也勢必相倚為患故驅之出  
太原則玁狁失勢而自去矣或謂玁狁即太原之戎  
則自太原而西至周不得復東侵鎬也



吉甫燕喜既多受祉來歸自鎬我行永久飲御諸友  
黿膾鯉侯誰在矣張仲孝友

鄒肇敏曰首二句是飲至之燕來歸以下則吉甫之  
私燕也若宣王燕吉甫則方叔亦同事者豈得不與  
采芑

薄言采芑于彼新田于此菑畝方叔涖止其車三千師  
千之試方叔率止乘其四騏四騏翼翼路車有奭簟第  
魚服鉤膺絳革

序曰宣王南征也張元祐曰此詩但詠車旗佩服無一語及于撻伐蓋狄強蠻弱乘戰勝之餘大張威武氣勢所及望風迎附深有得于用兵之略詩人推本于征伐獵狝得其要矣

芑即維糜維芑之芑爾雅云白苗也郭璞云即今之白粱粟采芑者非自采之蓋賦所見以起興嚴華谷云新田苗畝不應指萊何玄子曰穀亦可言采猶桑中之言采麥也其車三千考司馬法兵車一乘甲士

三人步卒七十二人周禮天子六軍共七萬五千人則車止千乘而此云三千鄭康成以為羨卒盡起孔氏以為兼起鄉遂王介甫以為合諸侯之師晦翁東萊皆以為極其盛而稱之非實有此數何玄子以為兵車重車之合百人則六鄉為正六遂為副共十五萬人其車數正得三千此論頗核然獬豸既克之後未必正副俱行且百人共車之法未必出于古制考之周禮小司徒注所引司馬法則又曰車一乘士十

人徒二十人是以三十人供一車也周禮五伍為兩  
兩者蓋因車以為名也其法必三十人而以二十五  
人為正卒五人為游闕與則六軍七萬五千人其車  
三千正與法合康成誤以彼為采地法故不取以釋  
此詩其實即鄉遂之法也但彼此軍制微有不同耳  
詳見閼宮篇及周禮略記周禮巾車金路鈎象路朱  
有奭是象路也鈎膺是金路之飾特賜之使得施于  
象路也其非戎路明矣乘命車鳴和鸞服命服錡玉

佩雍容以制勝所謂克壯其猶不戰而威者也蓋虜  
已在其目中無俟張皇為矣後世若武侯之羽扇綸  
巾叔子之輕裘緩帶粗得此意鈎疏引周禮注云馬  
婁領之鈎婁即公羊傳牛馬維婁之婁猶繫也音屢  
薄言采芑于彼新田于此中鄉方叔涖止其車三千旂  
旒央央方叔率止約軼錯衡八鸞瑤瑤服其命服朱芾  
斯皇有瑤蔥珩

歛彼飛隼其飛戾天亦集爰止方叔涖止其車三千師

干之試方叔率止鉦人伐鼓陳師鞠旅顯允方叔伐鼓  
淵淵振旅闐闐

鉦一名丁寧晉語趙宣子曰戰以丁寧倣其民注謂  
鉦也周禮大司馬之職最尊者執鼓最卑者執鐃故  
舉其首末以該之陳師鞠旅未必戰伐之事而伐鼓  
者已振旅而退是兵不血刃而功已成也末章特總  
叙其事本于壯猶宿望明非倖致之耳

蠢爾蠻荆大邦為讐方叔元老克壯其猶方叔率止執

訊獲醜戎車嘽嘽嘽嘽煒煒如霆如雷顯允方叔征伐  
獫狁蠻荆來威

蠻荆謂楚也楚為成王所封至夷王時王室微楚熊  
渠曰我蠻夷也不與中國號謚自尊為王後雖畏厲  
王而暫去之終未嘗一入朝也大邦謂天子之邦康  
王之誥曰皇天改大邦殷之命傳以蠻荆泛指荊州  
之蠻箋以大邦泛指列國之大皆非也

前三章之率止率之而往也此章之率止率之而歸

也鄭箋曰戎車衆盛威如雷霆言雖久在外無罷勞也  
霆說文云雷餘聲也鈴鈴所以挺出萬物爾雅注以  
霆為霹靂者非是陸佃云震雷謂之霹靂其緩者  
霆

車攻

我車既攻我馬既同四牡龐龐駕言徂東

序曰宣王復古也此與下章皆田獵之詩獨云復古  
者此以會諸侯為主見王命之復振也巡狩而肆覲



非獨文武之制其所從來遠矣

田車既好四牡孔阜東有甫草駕言行狩

甫田在今河南中牟縣

之子于苗選徒囂囂建旄設旐搏獸于教

之子謂有司不敢斥王也周禮大司馬之職仲夏教

芟舍羣吏撰車徒讀書契辨名號之用選徒囂囂即

其事也建旄設旐已詳出車篇師田之旐首皆注旐

故田之所建王制謂之大綏周禮謂之大麾教山名

在今鄭州滎澤縣此詩以會諸侯為主而先言田獵者蓋有司先為戒具以待也呂東萊曰晉師救鄭士季設七覆于敖前則敖山之下平曠可以屯兵翳蒼可以設伏所謂東有甫草即此地也

駕彼四牡四牡奕奕赤芾金舄會同有繹

周禮時見曰會殷見曰同判然二禮不可並行也義可相通不嫌連及猶之夏苗冬狩而既言狩復言苗也

決拾既伙弓矢既調射夫既同助我舉柴

四黃既駕兩騂不猗不失其馳舍矢如破

蕭蕭馬鳴悠悠旆旌徒御不驚大庖不盈

師之建旐其旆特大故以旆名六月之白旆央央商  
頌之武王載旆是也此曰旆旌蓋與師之所建略同  
之子于征有聞無聲允矣君子展也大成

之子于征猶言之子之為此行也有聞無聲矣天下  
稱其能而未嘗以其能自鳴天下稱其功而未嘗以

其功自鳴也蘇子由曰我必聲之而後人聞之我不聲而人則聞此其實有餘也

吉日

吉日維戊既伯既禱田車既好四牡孔阜升彼大阜從其羣醜

序曰美宣王田也五子之歌禽荒是戒伊訓無逸並斥游田此詩獨美之者以蒐狩之法原與軍政相表裏愚者自流失焉而宣王能得其道以收人心而復

王業也

曲禮云外事以剛內事以柔崔靈恩謂外事指治兵之事內事指宗廟之事至于郊維用辛社維用甲不在內外剛柔之例也孔叢子云凡類禡皆用甲丙戊庚壬之剛日師田皆治兵之事故田之吉日則用戊庚石鼓文曰日維丙申吾其用導亦用剛也既伯既禱爾雅云馬祭也周禮校人春祭馬祖而甸祝之職亦云禡馬杜子春注云為馬禡無疾也四牡孔阜正

禱于馬祖之詞禱禱同說文既伯作既禡則伯與禱  
為二祭禡者立表為師祭即周禮所云表貉也鄭注  
讀貉如伯司馬法曰偃伯靈臺亦即偃貉祭之表耳  
說文必非無據存之以俟再考

吉日庚午既差我馬獸之所同鹿麋麋漆沮之從天  
子之所

漆沮尚書孔傳云亦謂之洛水晦翁因之按水經沮  
水出北地直路縣東過馮翊殺禡縣入洛水漆水水

經注云濁水謂之柒水又謂之柒沮韓苑洛云嘗至  
同官縣見一大潭其水流出東壑問其居人曰漆潭  
至富平不百里即入洛是漆沮皆注于洛水此洛水  
所以有漆沮之名也禹貢所云導渭水東過漆沮者  
即此是已與扶風之漆水自別今一統志沮水之源  
無考惟洛水出慶陽府合水縣即古北地至耀州同  
官縣而合漆水即古袞襍也則所謂洛水者乃沮水  
耳洛水之源更在其北

瞻彼中原其祁孔有儻儻俟俟或羣或友悉率左右以燕天子

其祁謂地之廣大也

既張我弓既挾我矢發彼小豝殪此大兕以御賓客且以酌醴

兕爾雅云兕似牛犀似豕爾雅翼云兕與特音相近猶殺之為牯也則兕即犀之牝者古多謂之兕今多謂之犀以生海外者為貴中國亦或有之醴說文云



酒一宿熟也周禮醴齊注云成而滓汁相將宋本草  
衍義云造酒用麴造醴用蘖麴以麴為之故從麥蘖  
以粉為之故從米以此推之則醴者蓋今江南白酒  
再宿而即成成而滓汁相將飲之甚甘者是已

### 鴻鴈

鴻鴈于飛肅肅其羽之子于征劬勞于野爰及矜人哀  
此鰥寡

序曰美宣王也郝楚望曰自鹿鳴至此二十餘篇皆

朝廷制作不應忽入民謠蓋託于流民之言故末章  
美而寓規也

之子指同行者矜人流民自謂也言已在流民之中  
尤為可矜望同行者之提挈之也

鴻鴈于飛集于中澤之子于垣百堵皆作雖則劬勞其  
究安宅

鴻鴈于飛哀鳴嗷嗷維此哲人謂我劬勞維彼愚人謂  
我宣驕

庭燎

夜如何其夜未央庭燎之光君子至止鸞聲將將

序曰美宣王也託為王言以述其勤勞之意

周禮司烜供墳燭庭燎注云門外曰大燭門內曰庭燎蓋以所設之處而異其名其實一也覲禮諸侯乘墨車載龍旂以朝墨車亦有鸞者鸞有在衡有在鑣也鸞在衡者路車所設鸞在鑣者凡車皆得設之故墨車亦有鸞聲

夜如何其夜未艾庭燎晰晰君子至止鸞聲噦噦  
夜如何其夜鄉晨庭燎有輝君子至止言觀其旂

汙水

汙彼流水朝宗于海歟彼飛隼載飛載止嗟我兄弟邦  
人諸友莫肯念亂誰無父母

序曰規宣王也鄭箋曰規者正圓之器也孔疏曰物  
有不圓匝者規之使圓人行有不周匝者規之使周  
蓋宣王初年勵精勤政自不藉千畝而後怠心漸萌

詩人以為此人心之所繇失亂機之所繇伏故託于告其友以諷王主于敬以勝怠也

以水之得所歸隼之得所止興人情之必有所繫也凡人繫情于父母則必不敢以父母之身行殆其憂之深而慮之遠雖安而不忘危治而不忘亂矣故呼而儆之使聞之者無不惻然而痛于心也

汨彼流水其流湯湯歟彼飛隼載飛載揚念彼不蹟載起載行心之憂矣不可弭忘

以水之無所歸隼之無所止興人之不循理也不循理即謂不敬也一念放佚萬事隕越故憂之而不遑寧處也

歎彼飛隼率彼中陵民之訛言寧莫之懲我友敬矣讒言其興

以隼之有所循興人之有所戒也民之訛言即下讒言庶人之議也一事偶失人心則謗讟滋起而所拮之失多過于所行訛偽相傳不可遏矣寧莫之懲謂

匹夫勝予何乃忽其微賤莫之懲戒也儆者所以自懲也周書無逸篇曰厥或告之曰小人怨汝詈汝則皇自敬德厥愆曰朕之愆允若時不啻不敢舍怒正與此詩意同

鶴鳴

鶴鳴于九臯聲聞于野魚潛在淵或在于渚樂彼之園爰有樹檀其下維擇他山之石可以為錯

序曰誨宣王也集註備矣立誠達變勿徇愛憎而本

身出治之要大槩盡乎此矣然辭不直指義託遠諷  
所謂立象以盡意而意不盡于言者耶

鶴鳴于九臯聲聞于天魚在于渚或潛在淵樂彼之園  
爰有樹檀其下維穀他山之石可以攻玉

祈父之什

祈父

祈父予王之爪牙胡轉予于恤靡所止居

序曰刺宣王也宣王之末司馬失職千畝之戰軍士



皆怨詩人慮其將敗故述軍士之詞以諷王也王之  
爪牙分當敵王所愾所謂轉予于恤者調遣失宜優  
卹無聞也祈父蓋即康誥所云圻父薄違者蓋官之  
別名

祈父予王之爪士胡轉予于恤靡所底止

祈父亶不聰胡轉予于恤有母之尸饗

### 白駒

皎皎白駒食我場苗繫之維之以永今朝所謂伊人於

馬道遙

序曰大夫刺宣王也宣王不能用賢故賢者去之而不可留也詩中但言賢者之不可留而王之不能用隱然言外矣晦翁曰甌文公之徒諫既不行則小人乘間而用事如祈父所刺者是也小人在位賢者必不得志故不可留耳

皎皎白駒食我場藿繫之維之以永今夕所謂伊人于焉嘉客

王者有賓臣之禮故曰嘉客檀弓曰仕而未有祿者君有饋焉曰獻使焉曰寡君是賓臣之禮也

皎皎白駒賁然來思爾公爾侯逸豫無期慎爾優游勉爾遁思

逸豫無期言朝廷之上賴其經理庶幾磐石之安而逸豫無窮期也朝廷之倚重如此其可不審于濟時之義而慎爾優游乎其可不勵於匪躬之節而勉爾遁思乎蓋以賢者之出處係國家之安危所以勸賢

者正所以深傲王也

皎皎白駒在彼空谷生芻一束其人如玉毋金玉爾音而有遐心

其人不可留猶冀其音問之無絕如此慇懃繾綣之意蓋有世道之深思非僅僅一人之交情也

黃鳥

黃鳥黃鳥無集于穀無啄我粟此邦之人不我肯穀言

旋言歸復我邦族

序曰刺宣王也呂東萊之說備矣張元祐曰頻呼黃鳥見人無可與言者亦孤苦之極也

無啄我粟言無相侵迫也人之不善我將去之黃鳥或能念我耳

黃鳥黃鳥無集于桑無啄我粱此邦之人不可與明言  
旋言歸復我諸兄

不可與明言非意之來不可以理喻也

黃鳥黃鳥無集于栩無啄我黍此邦之人不可與處言

旋言歸復我諸父

我行其野

我行其野蔽芾其樛昏姻之故言就爾居爾不我畜復我邦家

序曰刺宣王也王氏之說集註載之篇末刺王之意備矣

我行其野言采其遂昏姻之故言就爾宿爾不我畜言歸思復

我行其野言采其菑不思舊姻求爾新特誠不以富亦祇以異

菑一名燕覆子即木通之實也瓢黃子黑可食求爾新特俗本作我誤也成從論語作誠以富傲貧奸民猶避其名以新間舊良民常蹈其失此不知禮教之過也其責人也恕其責上也切矣

斯干

秩秩斯干幽幽南山如竹苞矣如松茂矣兄及弟矣式

相好矣無相猶矣

序曰宣王考室也竹書宣王八年初考室禮雜記曰廟成則釁之路寢成則考之而不釁注云設盛食以落之此詩止言諸寢故曰考鄭氏以續妣祖為成宮廟故兼釁言之非也

天下之亂多起于家室家室之亂多成于兄弟故首以兄弟為禱

似續妣祖築室百堵西南其戶爰居爰處爰笑爰語



似續妣祖謂嗣續先人之業也協韵故妣先于祖鄭箋以妣為姜嫄者鑒說也歷考經傳周無姜嫄之廟以閼宮為姜嫄廟者始于毛傳康成因之以附會周禮殊不足信別自有辨

約之閣閣椽之橐橐風雨攸除烏鼠攸去君子攸芋芋蹲鴟也說文云大葉實根駭人故謂之芋芋是特大者為芋也故訓尊大

如跂斯翼如矢斯棘如鳥斯革如翬斯飛君子攸躋

革亦急也如鳥之警急也禮器匪革其猶革與棘通也

殖殖其庭有覺其楹噲噲其正噦噦其冥君子攸寧

覺與較通爾雅云較直也鄭箋云直毛于此云高大于大雅抑篇亦云直則訓直已足不必兼言高大詳見抑篇噲說文云咽也蓋人聲之所出也噦說文云氣牯也是噲噲者屋寬廣而聲肆達也噦噦者屋深邃而聲遏逆也

下莞上簟乃安斯寢乃寢乃興乃占我夢吉夢維何維  
熊維羆維虺維蛇

吉夢之占特假設其事以為頌禱非實也何玄子謂  
宣王之子幽王實亡其國夢既不靈幻語亦何足錄  
遂以是為非宣王之詩此真夢語也正月之詩云哀  
今之人胡為虺蜴此以虺蛇為吉兆者第取隱伏之  
義耳古人假象無所拘忌如螽者春秋所書以為灾  
而螽斯之詩以美后妃是已說文曰虺以注鳴陸農

師曰虺似蛇而小語曰為虺弗摧為蛇奈何非蝮蛇也

大人占之維熊維羆男子之祥維虺維蛇女子之祥

乃生男子載寢之牀載衣之裳載弄之璋其泣嗶嗶朱芾  
斯皇室家君王

言璋猶之言圭非有異義聊以叶韻耳

乃生女子載寢之地載衣之裼載弄之瓦無非無儀唯  
酒食是議無父母詒罹

儀者善之見于外者也女子之善以退藏為美

無羊

誰謂爾無羊三百維羣誰謂爾無牛九十其牯爾羊來思其角濺濺爾牛來思其耳濕濕

序曰宣王考牧也按周禮牧人掌六牲而阜蕃其物六牲不特牛羊而祭祀之典以牛羊為重故特舉之若馬為國之大用別立牧師掌之已詳車攻吉日之篇故不及也後世好大喜功之主知有車攻吉日之

可羨而已如此詩所稱鄙而不足道豈知所以兆太平者正在于此哉

爾雅釋牛云黑唇犝後又云牛七尺為犝詩蓋舉其高大者以槩其餘也

或降于阿或飲于池或寢或訛爾牧來思何簞何笠或負其鬴三十維物爾牲則具

爾牧來思以薪以蒸以雌以雄爾羊來思矜矜兢兢不騫不崩麾之以肱畢來既升

牧人乃夢衆維魚矣旒維旟矣大人占之衆維魚矣實  
維豐年旒維旟矣室家漆漆

古今占法約畧形似隨機立義非有典要可以証據  
也如衆維魚者潤澤沾濡之象也故為豐年旒維旟  
者自後而前日進之象也故為室家漆漆漆猶浸浸  
也周禮占夢職云歲終獻吉夢于王王拜受之予嘗疑  
此為習諂導諛之事必非周公所為及觀此詩乃知  
古人所獻之吉夢惟是歲之豐熟民之蕃昌而已故

拜受之所以重民事而為之召祥去灾者無所不用其極也

節南山

節彼南山維石巖巖赫赫師尹民具爾瞻憂心如惓不敢戲談國既卒斬何用不監

序曰家父刺宣王也家父人名也父與甫通今人亦有名甫者鄭以為字則詩中明言以究王訕豈有諫君而自稱其字者或以春秋所書家父疑即其人則



同時同國而名字相同者往往有之如魯成公之臣  
有兩嬰齊齊桓公之臣有三敬仲況相距數十年者  
乎即宣幽之際已有兩皇父矣則此家父自為幽王  
時人亦何足疑竹書幽王二年錫太師尹氏皇父命  
是尹氏皇父為一人竹書雖不足據然近古之書或  
不盡妄以詩詞考之以居徂向亦與弗躬弗親之語  
合

不敢戲談猶云不敢不以正告也

節彼南山有實其猗赫赫師尹不平謂何天方薦瘥喪  
亂弘多民言無嘉惜莫懲嗟

實毛云滿也猗與阿通隰桑阿難萋楚作猗儺是也  
曲阜曰阿言隱曲之處草木無不遍滿是其平也惜  
曾也係爾雅釋言文按民勞惜不畏明說文作替是  
惜與替通也替從日𣎵聲與替不同

尹氏大師維周之氏秉國之均四方是維天子是毗俾  
民不迷不弔昊天不宜空我師

尹者官名蓋以官為氏者氏從氏從一說丈山之旁  
箸者曰氏一者地也一在氏下故為本天根之宿名  
之曰氏以此周之氏言周之興亡係之也秉法度以  
齊衆為均周語律所以立均注均長七尺繫絃以均  
鐘音也何玄子曰不弔昊天言不恤昊天<sub>之</sub>譴怒也  
左傳吳伐郟季文子引此詩而曰有上不弔其誰不  
受亂又吳伐楚喪君子以吳為不弔亦引此詩其解  
甚明郝楚望曰空猶曠也我師謂大師也言尹氏不

宜虛踞其職曠我師位也

弗躬弗親庶民弗信弗問弗仕勿罔君子式夷式已無  
小人殆瑣瑣姻亞則無膺仕

尹氏不平即躬親無益然權歸于一民之被害猶有  
限也苟政出多門則民無所適從故曰弗信膺說文  
云無骨腊也蓋肉之腴者故訓厚

昊天不傭降此鞠詁昊天不惠降此大戾君子如屆俾  
民心闕君子如夷惡怒是違

君子當與四章之君子同蓋指王也王如能屈能夷則尹氏不必言矣屈毛傳云極也言有所限極而不自恣也

不弔昊天亂靡有定式月斯生俾民不寧憂心如醒誰秉國成不自為政卒勞百姓

駕彼四牡四牡項領我瞻四方蹙蹙靡所騁

項說文云頭後釋名云确也謂堅确之處是項為頸上之骨領雖與項同而當頸為領頸上之骨較大于

卷三  
頌故毛氏訓項為大言馬之肥大領與項齊也

方茂爾惡相爾矛矣既夷既懌如相驕矣

昊天不平我王不寧不懲其心覆怨其正

家父作誦以究王訕式訛爾心以畜萬邦

正月

正月繁霜我心憂傷民之訛言亦孔之將念我獨兮憂  
心京京哀我小心痲憂以痒

序曰大夫刺幽王也竹書幽王四年夏六月隕霜建

已之月周六月也幽王災異甚多獨舉一端者其詩作于此時可知也前篇多歸咎于人直辭也此篇多歸咎于天激辭也

張元祐曰首二句是目擊心傷之語按民之訛言大抵妖妄之言如西漢之末驚言大水至行詔籌之類此亦災異之事故五章曰召故老訊占夢耳

父母生我胡俾我瘡不自我先不自我後好言自口莠言自口憂心愈愈是以有侮

好言莠言與訛言不同訛言起于愚民之狂惑昏亂  
好言莠言自起于小人之傾詐反覆自口謂昧心而  
出之也

憂心惻惻念我無祿民之無辜并其臣僕哀我人斯于  
何從祿瞻烏爰止于誰之屋

并其臣僕言無罪之民俱將被囚虜而為臣僕耳若  
云已與之俱非大夫所以自處從祿與無祿之祿同  
義言何從得邀天幸免于禍患也烏止誰屋猶言鹿



死誰手也

瞻彼中林侯薪侯蒸民今方殆視天夢夢既克有定靡人弗勝有皇上帝伊誰云憎

謂山蓋卑為岡為陵民之訛言寧莫之懲召彼故老訊之占夢具曰予聖誰知烏之雌雄

為岡為陵喻訛言之變人以為小而不知其究也必有大患不可不自警也雌雄喻陰陽也凡災異之來陰陽分應訛言為變紛紜不一故占其事應未知陰

陽所屬耳歐陽永叔曰鳥之雌雄多以背尾毛色別之烏則雌雄不異故獨以為言

謂天蓋高不敢不局謂地蓋厚不敢不踏維號斯言有倫有脊哀今之人胡為虺蜴

有倫有類可推也有脊有理可循也言上下可畏無所自容則推類而極之循理而窮之跼天踏地情所實有非徒過激為此妄辭也

瞻彼阪田有苑其特天之扨我如不我克彼求我則如

不我得執我仇仇亦不我力

心之憂矣如或結之今茲之正胡然厲矣燎之方揚寧  
或滅之赫赫宗周衰似威之

胡然厲矣大全作胡為不知何本威與滅音異義亦  
不同滅者水滅之滅自外也威者火自威威自內也  
此正君子永終知敝之語故下云終其永懷語意相  
承其為未然之憂可見矣或以此疑為東遷後詩則  
瞻烏爰止于誰之屋豈是道已然之事者或又據竹

書平王之時別有攜王兩主並立民無適從故為此  
烏止誰屋之語則即以竹書考之衆寡強弱之勢判  
然必無此慮且竹書可信則繁霜正為幽王事耳

終其永懷又窘陰雨其車既載乃棄爾輔載輸爾載將  
伯助予

終其永懷承威之而言周雖未威憂其終必威也又  
窘陰雨內禍方殷外難復作也春秋隱六年鄭人來  
輸平公羊傳曰輸平猶隳成是輸為隳也敗也

無棄爾輔員于爾輻屢顧爾僕不輸爾載終踰絕險曾是不意

曾是不意言踰絕險而無失者曾是不以為意而可乎員訓益殊無所據按員與圓通說文圓全也有輔則輻不傷

魚在于沼亦匪克樂潛雖伏矣亦孔之炤憂心慘慘念國之為虐

兩云亦者游釜之魚不必言即在沼亦不樂也躍淵

之魚不必言即潛伏亦不免也至于潛伏不免此極困之時也君子致命遂志亦復何憂之有所憂者不在小人之禍已而在國政之虐民耳

彼有旨酒又有嘉穀洽比其隣昏姻孔云念我獨兮憂心慙慙

仳仳彼有屋蔌蔌方有穀民今之無祿天天是棣咎矣富人哀此惇獨

天通作殀短折也棣刑也言天命不永是棣害之商

書彤日篇云非天天民與此天天同義

十月之交

十月之交朔日辛卯日有食之亦孔之醜彼月而微此日而微今此下民亦孔之哀

序曰大夫刺幽王也按國語山崩川竭皆幽王時事則此詩為刺幽王無疑矣竹書幽王元年錫皇父命三年冬大震電五年皇父作都于向六年冬十月辛卯朔日有食之其事皆與此詩合竹書雖未可信乃

此詩日食漢晉諸人所不能推而竹書所紀歲月預合於大衍授時之法蓋為周末之書聞見猶有所據也鄭箋以為刺厲王者謬矣

唐書大衍歷議曰十月辛卯梁虞劄以歷推之在幽王六年開元歷定交分四萬三千四百二十九入食限加時在晝元史授時歷推是歲十月辛卯朔泛交十四日五千七百九分亦入食限十月者周正建酉之月也詩小傳曰詩有夏正無周正不知詩自七月



出車而外無不用周正者各詳本篇若求建亥之月  
辛卯日食以大衍授時歷法上下推之盡幽厲之年  
無一合者或謂歷年久遠天軌變移不可以數推則  
春秋二百四十年之事皆可推而得之幽厲之去春  
秋僅及百年豈遂不可推也若燿燿震電川沸山崩  
皆異時之事因詠日食連類而並舉之耳至謂二至  
二分食不為災此梓慎之謬說不足取也以同道相  
過為日食之常則四時日食皆有常數矣古今以為

大變者王者與天地一體譬如父母感疾人子皇皇營救此情理所必至況同其氣則亦同其數惟德盛者可以勝之苟遇歲寒而非松栢無不改柯易葉者矣孔仲達曰聖人假之神靈作為鑒戒豈足與語天人志氣之微哉

日月告凶不用其行四國無政不用其良彼月而食則維其常此日而食于何不臧

唐書歷志曰開元十二年七月戊午朔于歷當食半

強自交趾至于朔方候之不食十三年十二月庚戌朔于厯當食大半皇帝徹膳不舉樂日亦不食雖術數乖舛不宜如此若因開元二食曲變交限而從之則差者益多繇此觀之則月之避日事所誠有在開元之初一行以為德之動天未為諛也至宋太平興國二年十一月朔日食既是時遼司天臺奏言當食不虧夫日食千餘里而差一分宋遼相去不及二千里安得此食既而彼不食蓋遼人或不見食遂假天

以自神其習俗固然宋人效尤乃欲以此爭勝祥符  
以後太史屢奏當食不虧亦猶天書之故智耳不得  
與開元之事同類而稱矣日食繇于月掩月食繇于  
闇虛而闇虛之說莫知其故南齊書曰日月正隔于  
地為暗氣所食以天大而地小也宋景濂因之作楚  
客對謂月食本于地景萬厯中西域利瑪竇來自海  
外言與之合愚嘗詳辨而細究之知其說之有據也  
此不具載月食為常日食為不藏者日之食限八度

月之食限十三度有奇狹則難食廣則易食也日之食繇于月日高月下相距甚遠人之視之有東西南北之差故食常少月之食繇于景四時九服無不同也故食常多此亦陰屈陽伸天地自然之理聖人因而貴賤之也真西山曰于何不臧言吾何繇而有此不善之徵也

燭燭震電不寧不令百川沸騰山冢萃崩高岸為谷深谷為陵哀今之人胡惜莫懲

周語幽王二年三川震史記同之此云百川者蓋大川震而支川隨之也

皇父卿士番維司徒家伯冢宰仲允膳夫棨子內史蹶維趣馬楅維師氏豔妻嬭方處

鄭語史伯云虢石父諛諂巧佞之人也立以為卿士又曰不建立卿士而妖試幸措意當時皇父實為卿士而出居于向虢石父為其心腹攝行卿士之事耳節南山之斥尹氏曰弗躬弗親曰姻婭撫仕語正相

符其為一人可知番漢書作皮鄭桓公以八年為司徒此時司徒尚屬番也冢宰本作維宰膳夫掌王之飲食趣馬掌王之路馬內史掌以法詔王師氏掌以媼詔王皆近臣也舉司徒冢宰以大該小舉膳夫內史趣馬師氏以近該遠當時小人不止此也豔妻漢書谷永作閭妻注引魯詩以為厲后鄭宗毛氏乃亦參以浮丘申培之學與

抑此皇父豈曰不時胡為我作不即我謀徹我牆屋田

卒汙萊曰予不戕禮則然矣

我作周禮司士凡會同作士從註使之也下云擇有車馬則大夫亦從之徒向矣我作者大夫自我也徹除去也楚茨廢徹不遲是也

皇父孔聖作都于向擇三有事重侯多藏不慙遺一老俾守我王擇有車馬以居徂向

左傳桓王與鄭十二邑向在其中杜預云河內軹縣地今河南濟源縣西南其地在東周畿內何玄子曰



三有事王之三事也周書立政篇曰任人準夫牧作  
三事周官篇曰三事暨大夫蓋指六卿而言分其職  
則有六典總其要則惟三事勤事曰任人守法曰準  
夫撫民曰牧擇者擇之以自代也多藏貪冒聚斂之  
人也史稱石父好利殆其人與皇父見王室多故天  
下將亂既恐聚怨又恐失勢故名避賢路實植私黨  
名解朝權實營狡窟自以為得計而不知其實怨之  
愈深也桓王之以向與鄭猶稱蘇忿生之田則皇父

之不能有向可知禮問大夫之子曰能御矣是惟大夫得有車馬士則賜而後有以大夫從遷必假王命度是時早已有東遷之計而皇父以身先之也

黽勉從事不敢告勞無罪無辜讒口囂囂下民之孽匪降自天噂沓背憎職競由人

黽說文云鼃黽也人之勉力如鼃之奮躍故曰黽勉悠悠我里亦孔之痗四方有美我獨居憂民莫不逸我獨不敢休天命不徹我不敢傲我友自逸

我里故里也遷而不得其志則思其故里爾雅曰悠  
悠思也思而不得歸故甚病前曰今此下民亦孔之  
哀此曰四方有義民莫不逸所以形已之甚困也若  
曰以我視之彼可哀者又可慕矣蓋不樂為皇父之  
私屬而又不欲即休者將以其身挽回國事耳張元  
祐曰徹通也不徹命之窮也國事已不可為而精神  
愈加淬勵不肯悠悠偷生是何等力量

雨無正

浩浩昊天不駿其德降喪饑饉斬伐四國昊天疾威弗慮弗圖舍彼有罪既伏其辜若此無罪淪胥以鋪

序曰大夫刺幽王也雨當作周古鍾鼎文雨或作雨周或作雨字形彷彿誤周為雨耳周無正者言周無正大夫也周禮六官之長曰正

昊天說文云仁覆閔下則稱昊天對不駿其德而言則稱天之廣大對疾威而言則稱天之仁閔孔氏以是為誤者謬甚舍毛傳曰除也謂除其人也孔氏誤

解晦翁正之是已但訓舍為置本于子由似費解不如從傳

周宗既滅靡所止戾正大夫離居莫知我勛三事大夫莫肯夙夜邦君諸侯莫肯朝夕庶曰式臧覆出為惡

周宗既滅謂廢太子也左傳作宗周者誤太子國之宗統太子廢則宗統絕矣竹書幽王五年宜臼出奔宗社大計未有繫屬故曰靡所止戾史伯云褒姒為后而生伯服其為毒也大矣知必覆宗也三事已見

前篇大夫三事之屬各有中下大夫也或疑此亦東  
遷後詩則平王新立諸侯附之安見靡所止戾而為  
此不祥之語哉

如何昊天辟言不信如彼行邁則靡所臻凡百君子各  
敬爾身胡不相畏不畏于天

戎成不退飢成不遂曾我誓御憺憺日瘁凡百君子莫  
肯用訊聽言則答譖言則退

誓御猶言近侍蓋周禮內宰之類亦下大夫為之

哀哉不能言匪舌是出維躬是瘁哿矣能言巧言如流  
俾躬處休

維曰于仕孔棘且殆云不可使得罪于天子亦云可使  
怨及朋友


謂爾遷于王都曰子未有室家鼠思泣血無言不疾昔  
爾出居誰從作爾室

曰未有家室曰誰從作爾室則是非徒棄官且盡室  
以行棄其故土矣皇父則以出封諸臣何辭以去意

當是時戎禍方殷加以饑饉朝廷之上必建議東遷  
特以宜臼在申有所顧忌而未動然預為遷計已非  
一日故諸臣亦得棄此而營彼如鄭桓公賢司徒也  
東寄帑賄顯然行之曰以周難之故則當時情事蓋  
可見已鼠思泣血無言不疾蓋君國之痛有大不忍  
言者去者以進退維谷雖欲効死而不能故託言于  
故居之已廢居者以彼此同患雖欲改圖而無益故  
託言于新室之誰作也若云爾謂返而無室我謂爾



出亦未必有室也



讀詩畧記卷三